

**TEZAU LITURGIC**  
**23 OCTOMBRIE**

**ACATISTUL**  
**SF.CUVIOS**  
**IACOB**  
**DE LA**  
**BOROVICI**



**MOSCOVA, 2000**



# **Акафист**

## **святому праведному Иакову, Боровичскому чудотворцу**

### **Кондак 1**

---

Избранный от Царя Сил Господа Иисуса, дивно прославленный от Него святых мощей твоих явлением и множеством чудотворений, угодниче Божий Иакове праведный, о твоих источаемых нам благодеяниях благодарни суще, похвальное восписуем ти пение, и молимтися о еже от всяких бед свободитися нам твоими молитвами, радостно и умиленно тебе зовущим:

Радуйся, Иакове праведный, чудотворче Христов предивный.

### **Икос 1**

---

Ангелоподобное житие твое на земли являеши нам по смерти, богомудре Иакове, святых мощей твоих преславным прославлением, от нихже токи исцелений благодатных источаеши недужным. Темже Российская страна тобою

красуется, стяжавши тя, благодарованного  
целебника, мы же с любовью ти зовем:

Радуйся, великий угодниче Божий, утаивый  
от нас Отечество твое земное, да увериши, яко  
от Бога к нам послан еси.

Радуйся, равноангельный человече,  
облиставый нас божественною зареюпреславных  
твоих чудес.

Радуйся, небожителю, горе со ангелы  
обитаяй.

Радуйся, от небесных высот благосердием  
твоим к земнородным приникаяй.

Радуйся, в тайне Господеви поработавый в  
преподобии и правде.

Радуйся, явно и преславно от Господа  
прославленный нетлением и чудесы.

Радуйся, Иакове праведный, чудотворче  
Христов предивный.

## **Кондак 2**

Видя льдину, манием Божиим противу  
быстрин водных плывущую, и от нея дым  
кадильный горе возносящийся, недоумеваху  
людие веси Боровичския о необычном сем

явлении. Приставшей же льдине ко берегу речному, обретоша на ней на кладе древесней лежащия, нетлением процветшья святыя мощи твоя, смиренномудре Иакове. Темже и нас подвизаеши Прославльшему тя Господу пети: Аллилуиа.

## Икос 2

---

Разум божественныя тайны нераздевающе, убояшася людие Боровичстии прияти тя незнаема и непогребенна, и вспять отринуша льдину с мощами твоими в быстрину речную. Оней же паки к ним трижды возвращейся, представ святыи Иаков в соннем видении старейшинам Боровичским, обличил еси их сице глаголя: «Что гоните мя христианина верна, именем тезоименита святому апостолу Иакову брату Божию суща»; о сем радуящеся благодарим и зовем ти таковая:

Радуйся, незлобием твоим Христу Господу, от иудей гониму, подражавый.

Радуйся, простоту и неразумие отринувших тя не наказавый.

Радуйся, неведение их явлением твоим вразумивый.

Радуйся, веру твою во Христа ясно исповедавый.

Радуйся, имя твое святое от нас не скрывый.

Радуйся, благодать тебе от Господа дарованную чудесы преславными проявивый.

Радуйся, Иакове праведный, чудотворче Христов предивный.

### **Кондак 3**

---

Сила Божия славно прославися во святых мощех твоих, Иакове святе, к нимже притекающе, недужнии исцеление, слепии прозрение, немии ясноглаголение получаху, и здрави возвращахуся, прославляюще тя чудотворца милостиваго. Темже молим тя и нас, немощствующих грехи многими, посети благоутробне и умоли за нас Человеколюбца Бога, Емуже воспеваем: Аллилуиа.

### **Икос 3**

---

Имеюще помышления сумнительная о чуднем явлении мощей твоих святых, людие Боровичстии на бреже речнем положиша их на кладе древесней: обаче и время довольно лежавшим им тамо, неистлени явишася и чудесы о твоей святости удивиши, святче

Божий, прославляемый от верных богомольцев пении сими:

Радуйся, юности преизящная похвало.

Радуйся, свято процветшая розго небесного вертограда Иисусова.

Радуйся, цвете нетления, облагоухавый Российскую страну вонею благоухания Христова.

Радуйся, крине чистоты, пренесенный от земли в рай превышний.

Радуйся, многоцелебный сосуде безмездного врачевания недугов человеческих.

Радуйся, чудес источниче, оросивый нас к плодоносию духовному.

Радуйся, Иакове праведный, чудотворче Христов предивный.

#### **Кондак 4**

Буря недоумения смути святителя Новоградского Феодосия о преславнем явлении мощей твоих, святе Иакове: темже возвестити о сем первосвятителю Московскому Макарию и благоверному царю Иоанну вскоре потщася. Тии же весть благую приемше, верою познаша тя

чудотворца благодарованного, и со благодарным чувствием Прославльшему тя Христу Богу возгласиша: Аллилуиа.

#### **Икос 4**

---

Слышавше ближнии и дальнии неисцельно болящии, яко источник целеб точит священная рака твоя, угодниче Божий Иакове, со тщанием устремишася к тебе и по вере своей приимаху исцеления своим недугом, немолчными усты возглашающе тебе сия песенная словеса:

Радуйся, скорый помощниче скорбящих и озлобленных.

Радуйся, добрый целебниче болезнями обремененных.

Радуйся, благий посетителю неисцельно страждущих.

Радуйся, скоропредстательный врачу отчаянно недугующих.

Радуйся, укрепление немощных и разслабленных.

Радуйся, утешение унывающих и безнадежных.

Радуйся, Иакове праведный, чудотворче Христов предивный.

### **Кондак 5**

---

Богосветлая лампада, елеем милости Божия исполненная и преизливающаяся являешия, святче Божий Иакове в посмертных деяниях твоих, многим бо с верою притекающих к мощем твоим, благодетельствовал еси чудесно, и безчисленных недужных уврачевал еси милостивно, подвизая нас гласы немолчными воспевати тобою благодееющему нам Богу: Аллилуиа.

### **Икос 5**

---

Видевше велию благодать целебную, от Господа тебе дарованную посланнии от святителя Новоградскаго Феодосиа благоговейнии священницы принесоша цельбоподательныя мощи твоя в храм Божий, Иакове досточудне, да не сокрыт будет толикий светильник чудес, но на свещнице святолепнем Церкви Боровичския да светит всем, верою чтущым тя благохвалении сими:

Радуйся, добродетели твоя во глубине смирения твоего от нас сокрывый.

Радуйся, и мощем твоим святым вне храма Божия на долзе пребывати попустивый.

Радуйся, от брега речнаго, яко бисер многоценен в церковь Господню принесенный.

Радуйся, яко сокровище дражайшее, тамо положенный.

Радуйся, смирение совершенное и нищету неложную по смерти засвидетельствовавый.

Радуйся, убожеством риз твоих нестяжание твое обличивый.

Радуйся, Иакове праведный, чудотворче Христов предивный.

### **Кондак 6**

---

Проповедник немолчный твоих чудес явился святейший патриарх Никон, иже устроив обитель преславу Богоматери, тамо святыя мощи твоя с благолепною честью священства принести потщася, идеже и ныне, яко крин благоуханен пребывают источающа исцеления благодатныя всем требующым, Богу же вопиющим: Аллилуиа.

---

## Икос 6

Воссиял еси яко звезда путеводная, зарею чудес твоих, всех путеводящая к Небесному Отечеству, Иакове всеблаженне. Кто бо не умилился, видя, яко в юнем возрасте старцев добродетелию превозшел еси, и велий дар чудотворений праведно от Бога восприял еси; о сем дивимся и зовем ти во умилении душ и сердец:

Радуйся, избранниче Божий, непорочное житие на земли препроводивый.

Радуйся, любимиче Христов, кротостию и тихостию твоею блаженство кротких унаследовавый.

Радуйся, в мире скончавыйся и к премирным обителем райским возшедый.

Радуйся, со ангелы и всеми святыми тамо на веки водворивыйся.

Радуйся, гражданине всесветлаго града Иерусалима Горняго.

Радуйся, ангеле земный и человеке небесный.

Радуйся, Иакове праведный, чудотворче Христов предивный.

## Кондак 7

---

Хотя Человеколюбец Господь явити истину Православия святыя Восточныя Церкви благодатным нетлением мощей святых Своих угодников, и чудесы от них истекающими, сию свидетельствует, во обличение иноверных и неверных, и во утверждение православных. Сие дивное смотрение Божие в преславном явлении мощей твоих, Иакове праведный, разумеюще верою, приносим Царю Небесе и земли благодарственную песнь: Аллилуиа.

## Икос 7

---

Новое знамение благоволения Божия в стране Российстей видим в многочудесном явлении святых мощей твоих, Иакове праведный, и с любовью притекающе к твоему молитвенному заступлению, яко богодарованному заступнику нашему, приносим ти сия похвалы:

Радуйся, чудесы твоими истины святыя православныя веры удостоверивый.

Радуйся, присущей святей Восточней Церкви благодати Святаго Духа проповедниче.

Радуйся, грядущаго воскресения мертвых светлый прообразе.

Радуйся, немерцающего трисолнечного сияния светлейшее отображение.

Радуйся, вечныя бессмертныя о Христе жизни цельбоносныя проявление.

Радуйся, райскаго нескончаемаго блаженства всежелательный нам ходатаю.

Радуйся, Иакове праведный, чудотворче Христов предивный.

### **Кондак 8**

---

Странники и пришельцы суще в мире сем прелестнем, к тебе прибегаем Иакове святе: управи нас влающихся окормлением твоим к тихому пристанищу спасения, настави твоими молитвами на стезю покаяния, и заступи от всякаго диавольскаго искушения, да тобою вспомооществуеми, сподобимся улучшить блаженство вечное, и со ангелы и всеми святыми Создателю нашему пети: Аллилуиа.

### **Икос 8**

---

Весь бе в нижних, обаче и вышних духом не отступил еси, святе Иакове, егда живяше на земли. Ныне же пребываеши в вышних, предстоя со ангелы Престолу Господа Славы: обаче и нижних не отступаеши, молитвами

благоспешествуя нам и чудеса посещая нас,  
поющих тебе таковая:

Радуйся, неленостный воли Божией  
исполнителю.

Радуйся, буйство Христово паче премудрости  
мирския вменивый.

Радуйся, во смирении глубоцем безвестно  
жизнь праведную скончавый.

Радуйся, ангелы от земли к обителем  
небесным на лоно Авраамле пренесенный.

Радуйся, лику святых Божиих Престолу  
предстоящих горе сопричтенный.

Радуйся, благоволением Божиим и долу на  
земли нетлением и чудеса прославленный.

Радуйся, Иакове праведный, чудотворче  
Христов предивный.

### **Кондак 9**

Всяк возраст не неудобен благочестию  
бывает, аще осенит свыше благодать Божия,  
немошная врачующи и оскудевающая  
восполняющи: темже и тебе угодниче Божий, в  
юностнем возрасте толико укрепи, яко вся  
добродетели удобно совершил еси, и безплотным

непорочностию и чистотою уподобился еси, и еще на земли в брennem телеси, небесным нравом украшенный, сподобился еси достойно пети Богу ангельскую песнь: Аллилуиа.

## Икос 9

---

Витийство мудрых мира сего недоумет изъяснити тайну чуднаго нетления мощей святых Божиих: мы же, испытания чужди, верою несумненною залог безсмертия в сем видяще, с любовью припадаем ко святым и многоцелебным мощем твоим, святе Иакове, и яко вернаго раба Христова и чудотворца славнаго, венчаем тя благохвалении сими:

Радуйся, молитв благовонное кадило, благоухающее горе у Престола Божия.

Радуйся, крине благовонный, Церковь Российскую ароматы райскими усладивый.

Радуйся, бисере пресветлый, озаривший нас сиянием преславных чудес.

Радуйся, заре безсмертия, возсиявшая нам от гроба, являющаго нетленную жизнь.

Радуйся, мироположнице благодати, на всяк недуг душевный врачевание источающая.

Радуйся, подателю радования и утешения  
всяцей души скорбящей, с упованием и верою к  
тебе притекающей.

Радуйся, Иакове праведный, чудотворче  
Христов предивный.

### **Кондак 10**

---

Спасение и блаженство райское житием  
праведным унаследовав, святче Божий, ни в  
чемже лишен еси, но равный динарий с  
древними великими святыми от небеснаго  
Домовладыки прияв, моли прилежно о еже и  
нам немощным и грешным житие сие временное  
без порока прейти, и блаженство вечное  
улучити, и во Царствии Небеснем радостно пети  
Богу Спасителю грешных: Аллилуиа.

### **Икос 10**

---

Стеною молитв твоих, угодниче Христов,  
огради нас от всякаго душевреднаго искушения  
диавольскаго, яко тебе дарова нам Преблагий  
Бог покров и защиту душам и телесем нашим.  
Тебе убо прославляем и просим: помози нам во  
всяцей скорби и обстоянии, сице тебе  
вопиющим:

Радуйся, Церкви торжествующия на небеси  
изрядное украшение.

Радуйся, Церкви воинствующия на земли  
крепкое вспоможение.

Радуйся, целомудрия и чистоты зеркало  
светлейшее.

Радуйся, кротости и нищеты духовныя образе  
совершеннейший.

Радуйся, смирения любителю.

Радуйся, в жизни и по смерти образ  
смиренномудрия показавый.

Радуйся, Иакове праведный, чудотворче  
Христов предивный.

### **Кондак 11**

---

Пение умиленное, от любве и усердия в  
похвалу тебе от нас возносимое, прими  
благоутробне, святче Божий Иакове, воззри не  
на нас недостойных, но на усердное  
произволение наше, и подражая милосердию  
Христа Спасителя нашего, приклонися к нам  
милостивно, и в покаянии преуспети сподоби,  
да твоими молитвами всегда поем Богу:  
Аллилуиа.

## Икос 11

Светлую память твою, яко торжество веры и благочестия светле совершает святая Христова Церковь, угодниче Божий и чудотворче Иакове, созываючи верныя чада своя на похвалу праведнаго жития твоего и преславных чудес твоих. Приими убо, ублажаемый избранниче Христов, гласы хвалебныя, тебе радостно от нас возносимыя сице:

Радуйся, ангелов подобниче и человеков заступниче.

Радуйся, святых сожителю присный Богу.

Радуйся, яко предстоиши Божию Престолу во свете немерцающия славы.

Радуйся, венценосче, увенчанный от руки Вседержителя.

Радуйся, ризою нетления облеченный и даром чудес обогащенный.

Радуйся, молитвенниче неусыпаяй и предстателю богоприятный.

Радуйся, Иакове праведный, чудотворче Христов предивный.

## Кондак 12

---

Благодать целебную приял еси от Всещедрого Бога, Иакове святе, еюже недуги и язи человеческия врачуеши преславно, не мзды от нас ко уврачеванию требуя, но веры несумненные ожидая. Темже, ведуще тя врача благоискусна и целебника немздоприимна, к тебе прибегаем и по прошению дарованная благодеяния приемлем, поюще Богу: Аллилуиа.

## Икос 12

---

Поюще многочудесное прославление святых мощей твоих, исповедуем неисчетная твоя благодеяния, явленная и присноявляемая тобою всем с верою и любовью к тебе притекающим, Иакове досточудне, ихже и нас не лиши смиренных, упование на тя возложивших, и тако к тебе от глубины души вопиющих:

Радуйся, Святая Живоначальная Троицы благоволением горе осененный.

Радуйся, ангельским светозарным силам сопричтенный.

Радуйся, вечнаго ликования святых, во гласе радования блаженный сопричастниче.

Радуйся, блаженства неизглаголанного, праведным от века уготованного сонаследниче.

Радуйся, Духа Святаго обителе, чистотою благоуукрашенная.

Радуйся, душ и телес наших целебниче премилостивый.

Радуйся, Иакове праведный, чудотворче Христов предивный.

### **Кондак 13**

---

О чудотворче предивный и премилостивый, Иакове преблаженне! Малое сие моление наше милостивно приим, данною ти от Господа благодатию уврачуй немощи душ и телес наших: молитвами же твоими изми нас геенския муки, и сподоби с тобою и всеми святыми в райских селениях, пети Богу Спасителю нашему: Аллилуиа.

Этот кондак читается трижды, затем икос 1-й и кондак 1-й

### **Молитва**

---

О святыи великий праведниче и преславный чудотворче, богоблаженный угодниче Христов Иакове, дивно прославленный на Небеси и на

земли данный нам от Господа целебниче и заступниче, к тебе припадаем с верою, любовью и благоговением и молимся от глубины души: помози нам, зело прогневавшим Господа и Создателя нашего, и испроси нам вся яже к житию временному и спасению вечному потребная; земли плодоносие, воздушное благорастворение, душ и телес здравие, в покаянии и благочестии преспеяние, веры православныя укрепление, суеверия посрамление, неверия искоренение, и всякаго благаго прошения нашего ко Господу исполнение. Испроси у Господа: страждущую страну Российскую от лютых безбожников и власти их да свободит, и да возставит престол православных правителей; верных рабов Его, в скорби и печали день и ночь вопиющих к нему, многоболезный вопль да услышит и да изведет от погибели живот наш. Услыши, угодниче Божий, всяку душу христианскую, в скорби и обстоянии тя молитвенно призывающую, ускори на помощь, облегчи скорби, уврачуй недуги и явися скорый предстатель требующих твоего заступления. Наипаче же в час кончины нашея не закосни прийти на помощь нам и умоли Господа даровати нам кончину живота нашего

мирну, безмятежну, святых Христовых Таин причастну и упования исполнену да с надеждою спасения безбедно преидем страшный путь воздушных мытарств, и непреткновенно достигнем вожделеннаго онаго Царствия, еже уготовал Господь любящим Его. Ей, святче Божий! Услыши нас и не презри моления нашего, но сотвори нас соучастники быти блаженства вечнаго, да вкупе с тобою спасеннии милосердием Христа Спасителя нашего воспоем и прославим Его со Отцем и Святым Духом, во веки веков. Аминь.

